



8. august 2013

UKA 2013/39

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Suliffeqarfiit namminersortut pitsaasumik, inerititaqarfiusumillu iliuuseqartut, avatangiisinut mingutsaaliuinerikkut, nukissiuutit mingutsitsinngitsut atornerisigut, aammalu co2-mik aniatitsinermikkut annikillisaasut akissarsisinneqartalernissaannik Naalakkersuisut sulissuteqaqqullugit Inatsisartut aalajangiiffigisassaattut siunnersuut
(Inatsisartunut ilaasortat Siverth K. Heilmann aamma Gerhardt Petersen, Atassut)

Tunngavilersuut:

ATASSUT-mi avatangiisitta mingutsaaliornissaa, aammalu nukissiuutinik ataavartunik mingutsitsinikillisaanermillu qulakkeerinneqataasunik atuinerunissarput assut pingaartitaraarput. Tamannalu aamma nunatsinni avatangiisit illersorniarlugit, kulturitoqqatsinnullu naapertuuttumik politikkeqarnissamut suliniummi ilanngullugu alloriaqqinnissarput angorusupparput.

Nunarput Kyoto-mut isumaqatigiisummut pituttoqqavoq avatangiisinut silaannatsinnullu mingutsaaliuinermut annikillisaanissamut.

Nunatsinni suliffeqarfiit namminersortut pisortat suliffeqarfiutaanniit aningaasatigut periarfissakinnerupput avatangiisit innarlitsaaliornerinut timaliisumik peqataanissaminnut, aammalu silaannaap mingutsinneqarnerata millisarnissaanut allatigullu avatangiisit illersornerunissaannut iliuuseqarnissamut. Tamanna nunatta ataatsimoortumik iliuuseqarniarneranut naapertuutinnigilaq. Taamaattumillu ATASSUT-miit pingaartutut isigaarput, suliffeqarfiit namminersortut immikkut iliuuseqarniarneranni alloriaqqinnissamullu pitsaanerusumik angusassiinissamik, aammalu orniginarnerusumik sinaakkusiinissaq.

ATASSUT-miit qularutiginnigilarput suliffeqarfippassuit nunatsinniittut silaannatta avatangiisittalu mingutsaaliornernunissaanut peqataarusummata. Taamaattumillu isumaqarpugut aallartinnissaannut pilerinarnerusumik kinguneqarluartussamillu tunngavissiiinissaq piffissanngortoq.

Arlalitsigut „akissarsiaasinnaasunik“ ATASSUT-miit takorluugaqarpugut. Tamarmillu suliffeqarfinnut pilerilersitsisuussapput, immikkut avatangiisit silaannaallu illersornerunissaannut iliuuseqarusunnerulernissamik.

Taamatut suliniuteqarnissami ATASSUT-mit pingaartipparput nunatsinni inuutissarsiutinik ingerlatsisut aamma peqatiserineqarsinnaaneri – taakkuummatami aamma tikkuussilluarsinnaasut

sutigut qanorlu namminersortutut ingerlatsinermi avatangiisitta mingutsaaliorneqarnissaanut peqataanerunissamut aporfingineqarsinnaasunik unammillernarsinnaasunillu ilisimasaqarluartut.

ATASSUT-miimmi arajutsisimanngilavut illoqarfiit ilaanni suliffeqarfiit qanimut avatangiisit salingaatsuutinnissaannut peqataalluartartut – qanorlu aamma tamanna nuannersumik innuuttaasunit tigulluarneqartarnersoq.

Aningaasatigut akissarsiaasinnaapput, imaluunniit nukissuutit mingutsitsinngitsut akissarsiaralugit, imaluunniit suliffeqarfiup arlaatigut nammineq iluaqutigisinnaasaanik akissarsititsineq iluseqarsinnaavoq. Takorloorneqarsinnaavoq ukiup naanerani tamanna toqqaaneq pisarsinnaasoq, ukiup qaangiutilersup iliuuseqarfigisimaneranik tunngaveqartoq.

ATASSUT-miit neriutigaarput avatangiisitta, silaannattalu annerusumik iliuuseqarfigerusunneranni peqatigineqarluassalluta.

Siunnersuutip pisortanut aningaasatigut allaffissornikkullu kingunissai:

Siunnersuut pisortanut aningaasatigut allaffissornikkullu kinguneqassaaq, siunnersuut akuerineqarpat qanoq annertutigisumik aningaasaliisoqartoq aalajangerneqarnera tunngavigalugu. Uanilu oqaatigiuminaappoq massakkut qanoq pisortanut aningaasartuutaassanersoq, siunnersuutip akuerineqarnerata kingorna qanoq timitaliisoqassanersoq ilusilersorneqartussaammat.

Siunnersuutip namminersortunut aningaasatigut allaffissornikkullu kingunissai:

Siunnersuut namminersortunut aningaasatigut allaffissornikkullu kinguneqassanngilaq.

Siunnersuut innuttaasunut aningaasatigut allaffissornikkullu kingunissai:

Siunnersuut innuttaasunut aningaasatigut allaffissornikkullu kinguneqassanngilaq.